

दिनांक 24.10.2024

समय: 18.45 बजे

आकाशवाणी जयपुर-अजमेर

प्रादेशिक समाचार

- केन्द्रीय मंत्रिमंडल अंतरिक्ष हलका सारू खास एक हजार करोड़ रुपया रा वेंचर कैपिटल फंड ने मंजूरी दीनी।
- राज्य री सात विधानसभा सीटां माथे उपचुनाव सारू हाल ताई 37 उम्मीदवार नामजदगी रा पर्चा दाखिल कीना- काल नामपाना दाखिल करण रो आखिरी दिन।
- राज्यपाल हरिभाऊ बागडे विश्वविद्यालयां ऊं राष्ट्रीय शिक्षा नीति रा तैत नौकरी-धंधा मुहैया करावण वाळा कोर्स बणावण माथे जोर दीनो।
- देश रा आतूणी राज्यां रो सामुदायिक रेडियो सम्मेलन आज जयपुर मांय सरू व्हयो।

000

केंद्रीय मंत्रिमंडल अंतरिक्ष हलका सारू खास एक हजार करोड़ रुपया रो वेंचर कैपिटल फंड मंजूर कीनो है। ई वेंचर कैपिटल फंड ने फंड चलावण री मियाद ऊं पांच साल ताई बधायो जा सकेला। निवेश रा मौकां अर फंड री जरूरत रा आधार ऊं औसत रकम डोढ सौ ऊं अढाई सौ करोड़ रुपया सालाना व्हे सके है। केन्द्रीय मंत्रिमंडल री आज व्ही मीटिंग मांय ओ फैसलो करी ज्यो। मीटिंग मांय करी ज्यो फैसलां री जाणकारी देता थकां सूचना अर प्रसारण मंत्री अश्विनी वैष्णव बतायो के ओ खजानो रणनीतिक तौर ऊं भारत रा अंतरिक्ष हलका रा काम ने आगे बधवण अर नवाचार अर माली बरकत ने बधावो देवण सारू बणायी ज्यो है। मंत्री वैष्णव बतायो के मंत्रिमण्डल री मीटिंग मांय 6 हजार 798 करोड रुपया रा खर्च वाळी रेलों ऊं जुड़ी दो परियोजनावां ने ई मंजूरी दीरीजी।

000

प्रदेश री सात विधानसभा सीटां माथे उपचुनाव सारू हाल ताई 37 उम्मीदवार पर्चा दाखिल कीना है। निर्वाचन विभाग ऊं मिली जाणकारी रे मुजब आज 26 उम्मीदवार नामपाना दाखिल कीना। आज झुंझुनूं मांय छह, दौसा मांय आठ, खीवसर अर सलूम्बर मांय चार-चार, रामगढ़ मांय दो अर देवली-उनियारा अर चौरासी सीट माथे एक-एक उम्मीदवार पर्चा दाखिल कीना। उपचुनाव सारू पर्चा दाखिल करण रो काल आखिरी दिन है। पर्चा री जांच 28 अक्टूबर ने करी जावेला अर नाम 30 अक्टूबर ताई पाछा लिया जा सकेला। 13 नवम्बर ने वोट पडेला अर 23 नवम्बर ने वोटों री गिणती करी जावेला। ई बीचे उपचुनाव सारू प्रचार रो काम जोर पकड़बा लाग्यो है। मुख्यमंत्री भजनलाल शर्मा आज झुंझुनूं अर दौसा मांय भारतीय जनता पार्टी रा उम्मीदवारां री हिमायत मांय जनसभा कीनी। सलूम्बर, झुंझुनूं अर रामगढ़ मांय उम्मीदवार पर्चा दाखिल करण ऊं पैली वाहन रैली निकाली।

000

राज्य मांय दिसम्बर महीना मांय व्हेवण वाळी राइजिंग राजस्थान इन्वेस्टमेंट समिट ने ध्यान राखता थकां जिला स्तर माथे ई निवेशकां रा सम्मेलन राख्या जा रह्या है। चित्तौड़गढ़ मांय राख्यी ज्यी राइजिंग राजस्थान इन्वेस्टर्स मीट मांय 8 हजार 345 करोड़ रुपया रा निवेश रा 228 प्रस्ताव मिल्या। आं रे जरिए 18 हजार ऊं बत्ता लोगां ने नौकरी-धंधा मिलेला। चित्तौड़गढ़ रा प्रभारी उपमुख्यमंत्री डॉ. प्रेमचंद बैरवा वर्चुअल तरीकां ऊं सम्मेलन ने सम्बोधित कीनो। वे कह्यो के निवेशक चित्तौड़गढ़ मांय कारखाना लगा र जिला रा विकास ने और तेज करेला। कार्यक्रम मांय नान्ही फिल्म बतायी ज्यी अर न्यारा-न्यारा सामान री प्रदर्शनी लगायी ज्यी। ब्यावर मांय आज राख्यी ज्यी सम्मेलन मांय 2 हजार 845 करोड़ रुपया रा निवेश रा करार करी ज्यी, जिण ऊं 8 हजार ऊं बत्ता लोगां ने नौकरी-धंधा मिलण रा आसार है। सम्मेलन मांय प्रभारी मंत्री झाबर सिंह खर्रा कारोबारियां ने राज्य सरकार कानी ऊं कारोबार ऊं जुड़ी न्यारी-न्यारी समस्यावां आगी करण रो भरोसो दिरायो।

000

राजस्थान हाईकोर्ट नदियां, जलग्रहण हलकां अर तळावां अर कूड़ा-बावडियां कने गैर कानूनी बणाई-चुणाई अर कब्जा माथे खुद संज्ञान लीनो है। अदालत राज्य रा मुख्य सचिव अर जल शक्ति मंत्रालय रा सचिव ऊं रपट मांगी है। अदालत गैर कानूनी कब्जा रोकण अर कानून री पालना तैय करण रा जतन री विगतवार जाणकारी मांगी है।

000

राज्यपाल हरिभाऊ बागडे विश्वविद्यालयां ऊं राष्ट्रीय शिक्षा नीति रे मुजब काम-धंधो सिखावण वाळा कोर्स तैयार करण माथे ज़ोर दीनो है। वे आज जयपुर मांय प्रदेश रा वित्त पोषित विश्वविद्यालयां मांय नेक रैंकिंग अर नुवी शिक्षा नीति ऊं जुड़्या मुद्दां माथे राख्यी ज्यी कार्यशाला मांय बोल रह्या हा। वे राज्य रा सगळा वित्तपोषित विश्वविद्यालयां री निश्चित तौर ऊं नेक रैंकिंग करावण अर ई सारू हाल ताई री तैयारियां रो जायजो लीनो।

राज्यपाल कह्यो के प्रदेश मांय आला दर्जा री सिखावण देवण वाळा संस्थानां मांय गुणवत्ता वाळी संस्कृति विकसित करण सारू नैक रैंकिंग जरूरी है। ई सारू वे विश्वविद्यालयां ने कोर्स और बेहतर बणावण, परीक्षा री व्यवस्था मजबूत करण, अनुसंधान अर नवाचारां ने अपनावण बाबत कह्यो।

000

राज्यपाल हरिभाऊ बागडे भगवान महावीर रा अहिंसा, अपरिग्रह अर करुणा रा संदेश ने मौजूदा दौर मांय ई प्रासंगिक बतायो है। वे आज जयपुर मांय राजस्थान जैन सभा री ओर ऊं मनाया जा रह्या 'अहिंसा पर्व वर्ष 2551' रा उद्घाटन जळसा मांय बोल रह्या हा। राज्यपाल बागडे कह्यो के भगवान महावीर रा निर्वाण ने अढाई हजार साल पूरा व्हेवण रे मौके ओ बगत वां री सीख ने आगे बधाता थकां देश रा पूरा विकास सारू काम करण रो है। इण ऊं पैली राजस्थान जैन सभा रा अध्यक्ष सुभाष चन्द जैन 'अहिंसा पर्व' मनावण री कार्ययोजना री विगतवार जाणकारी दीनी। राज्यपाल भगवान महावीर रा निर्वाणोत्सव ने 'अहिंसा पर्व' रा तौर ऊं मनावण री सराहवणा कीनी।

000

श्रीयादे माटी कला बोर्ड रा अध्यक्ष प्रहलाद राय टांक जनता ऊं दीवाळी रे मौके गारा रा दीया रो उजीतो कर र खुशियां मनावण अर रसोई मांय गारा रा बर्तनां मांय पकवान बणा र देश मांय बण्या सामान ने बधावो देवण री अपील कीनी है। टांक आज जयपुर मांय खबरनवीसां सागे बातचीत करता थकां कह्यो के दीवाळी रे मौके गारा रा खिलौना अर बर्तन भेंट करण ऊं कुम्हार कामगारां ने और काम-धंधो मिलेला अर वां री आमदनी मांय बधोतरी व्हेला। टांक राज्य रा सगळा विधायकां अर सांसदां ने खत लिख र गारा ऊं बणी चीजां भेंट करण री अपील कीनी।

000

रेल मंत्रालय दीवाळी अर छठ पूजा रा त्यौहारी सीजन रे दौरान मुसाफिरां री बधती तादाद ने ध्यान राखता थकां सात हजार खास रेलगाडियां चला रह्यो है। रेल मंत्री अश्विनी वैष्णव नई दिल्ली मांय कह्यो के आं खास रेलगाडियां ऊं रोजीना करीब दो लाख मुसाफिर सफर कर

सकेला। वे कह्यो के लारला साल चलायी ज्यी साढे चार हजार रेलगाड़ियां रे मुकाबले ई साल रेलगाड़ियां री तादाद बधा र सात हजार कर दीरीजी है।

000

देश रा आतूणी राज्यां रो सामुदायिक रेडियो सम्मेलन—सीआरएस आज जयपुर मांय सुरू व्ह्यो। सूचना अर प्रसारण मंत्रालय री ओर ऊं भारतीय जनसंचार संस्थान—आईआईएमसी, नई दिल्ली री मदद ऊं राख्या जा रह्या दो दिन रा ई सम्मेलन रो उद्घाटन संस्थान रा अपर महानिदेशक निमिष रुस्तोगी कीनो। ई मौके वे कह्यो के गांवाई हलकां रा विकास मांय सामुदायिक रेडियो रो खास काम है अर सरकार आं ने लगातार बधावो दे रही है। ई सम्मेलन रो मुद्दो है “भारत में सामुदायिक रेडियो के बीस वर्ष पूरे होने का उत्सव”। सम्मेलन मांय सामुदायिक रेडियो स्टेशनां ऊं संबंधित मुद्दां माथे विचार कर्यो जा रह्यो है। सम्मेलन मांय महाराष्ट्र, मध्यप्रदेश, गुजरात अर राजस्थान रा सामुदायिक रेडियो स्टेशनां रा 100 ऊं बत्ता नुमाइंदा शिकरत कर रह्या है।

000

प्रधानमंत्री नरेन्द्र मोदी आकाशवाणी ऊं 27 अक्टूबर दीतवार ने प्रसारित कर्या जावण वाळा खास कार्यक्रम ‘मन की बात’ मांय विचार बतावेला। आ हर महीना प्रसारित कर्या जावण वाळा ई रेडियो कार्यक्रम री 115 वीं कड़ी व्हेला। आप काल तांई मुफ्त नम्बर 1 8 0 0 – 1 1 – 7 8 0 0 माथे राय भेज सको हो। ई सागे ई 1922 नम्बर माथे मिस्ड कॉल दे र एस.एम.एस. माथे मिल्या लिंक माथे ई राय दी जा सके है। नरेंद्र मोदी एप अर माई जीओवी ओपन फोरम रे जरिये ई राय दी जा सके है।

000

राजस्थान लोक सेवा आयोग री ओर ऊं दीतवार ने प्रोग्रामर प्रतियोगिता परीक्षा 2024 ली जावेला। आ परीक्षा जयपुर शहर रा 109 केन्द्रां माथे व्हेला। दो पारियां मांय व्हेवण वाळी आ परीक्षा देवण सारू 35 हजार 746 उम्मीदवार नाम मंडाया है। जिला कलेक्टर डॉ. जितेन्द्र कुमार सोनी बतायो के परीक्षा करावण सारू कलेक्ट्रेट मांय कन्ट्रोल रूम बणायी ज्यो है।

000

भारतीय रिजर्व बैंक—आरबीआई रा परिचालन रा 90 साल व्हेवण रे मौके आरबीआई त्पू90 प्रश्नोत्तरी होड़ सुरू कीनी ही। आ होड़ स्नातक स्तर रा विद्यार्थियां सारू देशभर मांय करायी जा रही सामान्य ज्ञान—आधारित प्रश्नोत्तरी होड़ है। इण ई कड़ी मांय प्रदेश मांय राज्य स्तर रो दौर आज जयपुर मांय राख्यी ज्यो। इण मांय प्रदेश रा न्यारा न्यारा कॉलेजां री 90 टीमां शिरकत कीनी। आं मांय ऊं छह टीमां बीचे व्ही होड़ जीतण वाळी टीम 3 दिसम्बर ने इंदौर मांय व्हेवण वाळा जोनल राउंड मांय राजस्थान री नुमाइंदगी करेला।

000

आज विश्व पोलियो दिवस है। ओ दिन पोलियोमाइलाइटिस बीमारी ने खत्म करण री कोशिशें सारू मनायो जावे है। आ बीमारी खास तौर ऊं बालपणा मांय व्हे है। ई साल विश्व पोलियो दिवस रो मुद्दो “हर बच्चे तक पहुँचने के लिए एक वैश्विक मिशन” राख्यी ज्यो है। ओ दिन बच्चों ने ई बीमारी ऊं बचावण सारू पोलियो ऊं बचाव रा टीका लगावण रा महत्त्व रा बारा मांय जाग जगावण सारू मनायो जावे है। विश्व पोलियो दिवस 24 अक्टूबर ने जोनास साल्क रा जन्मदिन रे मौके मनायो जावे है, जो पोलियो री बीमारी ऊं बचाव रो टीको विकसित कीनो हो। अंतर्राष्ट्रीय पोलियो दिवस रे मौके प्रदेश मांय ई न्यारा—न्यारा कार्यक्रम राख्यी ज्यो। अलवर मांय पोलियो अर डिप्थीरिया री बीमारियां ऊं बचाव सारू जागरुकता रैली निकाली ज्यी।

000